



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

## 9. Kalenderwoche – ab 26. Februar 2011

# Vorfedded

Isch due eischendlich bloß ganz seldn zum Arzd gehn - zum Onkl Dogdor, wie mor als Kinnor gesachd ham. Nee, isch hab ja noch Arbeit un muss meine Freizeid nisch mid Lisd un Digge dodschlachn. Es is ja eene sähr beliebde Art un Weise, de Freizeid im Wardezimmor beim Arzd zu vorbring. Da is Abwechslung un Schbannung! Die zähn Euros Braxisgebiehr, die dud mor doch eema im Gwardahl gerne bezahln! Bei soviel Unnorhaltung, sachd ooch meine Gudste!

Besondersch schbannend is ja dann immor de Frache, was dud dähr findn, wenn de sachn dusd, dasses dir in dor Bauchgäschend biegsn dud? Odor wenn de sachsd, dass de so e gemeenes Schdeschn im Hinnorkobb hasd? Odor so e bleschornes Rummorn im Darm?

Ja, mor sachd am Anfang, was mor schbiern dud odor was ehm weh dun dud un dann fängd dähr Arzd an zu suchn. Mid ernsdor Miene! Dud disch abdasdn un in disch neinhorschn. Da dud mor sisch eschd wischdisch vorkomm! Un wemmor sisch womeeschlich freimachn muss... hohoho!

So e Arzd is ja ooch bschyschologisch gebildet un weeiß, dass mor dähn Badsjendn ernsd ne mm muss. Also, dähr weeiß, dass mor wenischdens so dun muss! Als Arzd darfsde ja nisch sachn, was de denksd! Wenn e Arzd sachn däde - Simmuland! - odor - Sie sinn eenfach zu fedd! Zähn Kilos abnehm! Das däde so sein, wie wenn e Lähror zu de Eldorn von vorsedzungsgefährdede Kinnor sachn däde - wegschmeißn un neu anfang!

Mansche Ärzte sinn ja dann wie so Griminalgommissare ausm Dadord - die dun ganz systemadisch vorgehn. Die dun de Schburn sischorn un sammeln de Indizien. Dann nemmse dir das

Blud - nee, nisch weeschn dor DNA - eenfach so weeschn alle Blutwährde... un dann schiggense se disch zu de Golleschn. Zum Rönschn, zum Ordhobädigor... - ooch e Schnubbn kann am Ende an dor falschn Einlaache lieschn! - odor zum Indornisdn, dähr dir ma in dähn Bauch neinguggn soll.

Das is bei mir gewähsn. Isch mussde, nachdähm isch erzähld hadde, dasses mir ofd im Bauch rumgehn dud, da mussde isch zum Indornisd. Dähr had mir nu in dähn Bauch neingeguggd. Mid Uldraschall. Had nisch weidor weh gedahn. Abor nu had dähr de Beschährung gesähn. Das heeßd, de Milz is okeeh gewähsn. Zur Galle haddor gesachd - schdeinfrei! Daderbei hädde isch weddn kenn, dass schdeinreich is! Abor dor Hammor kam bei dor Lähbor! Da sachd dähr - vorfedded! Erschdes Schdadium! Un so ähnlisch dad das ooch im Befund schdehn, dähn mei Arzd dann gegrischd had. Die Feddlähbor had zwahr gahr nischd dadermid zu dun, dasses mir immor im Bauch rumgehn dud, nee, es is sozusachn e ungewolldes Zufallsergäbnis dor Ermiddlungen. Dor Mördor is nisch gefassd, abor e Dieb beim Glaun! Un wosch nu jedzde bei meim Arzd gewähsn bin, da dads gahr nisch mähr um mein Darm gehn, sondorn um de Lähbor! Sie missn gesündor lähm, haddor gesachd. Weenischor Algehol! Un daderbei hadde isch bloß weeschn meim Darm, wos mir manschma rumgehn dud... - un nu habsch dähn Sallahd! Weenischor Algehol...!

**Eduard Sachsenmeyer**